

味經書院志

卷之四

關中叢書

味經書院志

邵力子署

陝西通志館印

關中叢書

陝甘味經書院志序

志之例出於史而不專於史蓋雜山經水注考工記宮殿
簿之義古人作事必有志而後法可因傳可久官司尤甚
書院非官司然稟請咨提領發報銷有文簿焉典守者曹
於文奸滑得而把持之膏火脩脯將歸侵蝕訓誡條告誦
讀行習有法式焉繼至者昧其法佻達因而玩弄之規制
教法將盡銷亡而造養人材之地安知不爲汨沒人材之
區也味經書院自今河督前學院許仙屏先生崛起創建
卽延余宗夢軒先生爲師詳定規模有益陝省者甚鉅夫
其益之鉅正其法之善用心之勤也書院是而法與心非

創始者能不戚於心與煥唐先生知之起而收集散佚都爲一冊名曰味經書院志藏之篋笥余承乏味經得讀一終因悉創造之艱難教法之詳備繼至者之損益因革均可沿流溯源則志書院正志創始諸公之心也創始之心常存書院之益吾陝者不永永無極哉余因請付手民永存書院先生許之嗚乎後之覽斯志者因先生之文以上求經營締造及因革損益者之心必有不忍令良法湮沒者慨然惻然而思變通扶持以盡其宜是則煥唐先生及余之心也夫煥唐爲許公所取士故其言詳且切焉是則讀者自見之故不贅昔光緒甲午嘉平月太華史家榮序

於味經書院之監院署

徵求諸書刻之海內器光緒甲午歲平月太華史家餘序

陝甘味經書院志

經始第一

同治初元陝西回匪創亂州郡爲墟繼以髮捻交訌備極屠毒越十一載始得以次蕩平予遺之民瘡痍未復人尠知學家無藏書時奉新許公振禕以侍讀督學陝甘慨然以振文教爲己任始假涇陽瀛洲書院延師訓課旣籌經費設味經書院於涇陽城內東北隅乃上疏曰竊惟風俗盛衰視乎人才而人才隆替由乎學校學校教士實養士之地也士人有廉恥而後鄉里有風化庠序有秀異而後在官有循良其始僅章句誦讀之爲其究則生民休戚之

寄故一人爲而衆人效方正邪僻分類殊趨謂之風氣一人倡而衆人遵學問議論先入爲主謂之師承其源甚微其流甚大不可不謹也夫欲有所用以收得人之效則必有所養以爲儲才之基臣伏見國家作育人才府縣設學復聽所在舉行書院法良意美得人稱盛惟奉行日久教官往往視爲具文平時因循迨學政按臨所駐不過旬日而又逐日校藝卽有所牖迪亦不過布條教舉大綱至於教士之實竊以爲莫如書院院長得人而謂不能挽回風氣振興人才者未之有也伏查近日書院之弊約有二端一由院長爲紳士退休之資其延訂也論名位徇情分官

場以爲一歲之應酬紳士以爲一家之取給評點甲乙苟簡從事而於學問人品概未之及如是者不得謂之教一由經費悉隸官吏凡印官兼轄書院往往虛領其名而未察其實其款項生息支發一切皆書吏主之積年旣久侵蝕失計日見支絀士無所藉難以棲止如是者不得謂之養臣自抵任以來因查西安有關中宏道兩書院爲陝甘兩省士子肄業之區關中督撫主之宏道學政主之惟自軍興以來士多貧苦不能自食又不能從師雖欲聞經明行修之要其道無由因擇適中之地於涇陽城內添設味經書院其規模與關中宏道相等臣捐廉爲之倡而各屬

紳士好義急公者大率皆醵金襄事業已設立講堂號舍
開課舉行其定章有不同他書院者三他書院專課詩文
味經之設其要以實學爲主令諸生逐日研究

欽定七經及綱鑑諸史大學衍義衍義補文獻通考等書
引之識義理稽故實手鈔口誦日漸淹貫匪惟腹笥可充
卽政事亦差知條理其設課也則合制藝論策經解詩賦
法戒錄分課一一爲之使之知學古之爲貴他書院除閱
課外師弟不常接見今則山長日登講堂傳集諸生將經
史大義及小學逐條講貫察其課程閱其劄記別其勤惰
嚴其出入令其由嚴憚以生清明本講貫而得服習使之

知植品之爲先他書院屬之於官官有遷移則法必中變
官有職務則事難兼攝卽如宏道書院歸學臣董理如臣
終年在外按試相隔千里何能稽察今味經之設臣悉擇
一方之望以之專理一方之學雖創始由臣而日久經理
究以責成紳士爲當蓋權不歸官則延師可免徇情敷衍
之弊非物望素孚學品兼優者必不能居此席費歸實用
則經理可免侵蝕支絀之虞非廉介自持鄉里推服者必
不能與其事羣力維持思培子弟使之知成法之可繼此
臣倡建味經書院之初意如此也臣徧查陝甘人望所歸
得保升同知前平利縣教諭史兆熊學有本原體用兼備

延爲書院院長訂期十年而以城固訓導姚劭誠澄城教諭王賢輔協理講席兆熊品端學粹遊其門者多所成就前在興安勸辦一府堡寨一千數百餘所賊犯興安不能逞志全活甚多歷經大吏保薦兆熊每爲學徒攀留不能出仕其恬退而有實用如此劭誠長於經學志在誘迪賢輔澹然無欲留心風化此皆關中方聞之士正學之選置之訓迪必有可觀記稱七年小成九年大成臣之責以十年者亦準斯義如造士無效臣請受謬舉之咎其承管經費課程膏火責成紳士候銓同知怡立方教職張樞楊彝珍吳乙東謝鴻猷從九牛興宗等立方廉正勤懇才識素

優歷年籌衛地方久著成效其餘諸人亦皆物論推重以之經理書院不僅培養人才日有起色卽義倉蠶桑諸事亦可次第舉行不動公家纖毫之款而可興地方無窮之利似於教養可收實效臣觀諸人俱誓心竭力願任培植不求保獎不居成功良由關中風俗之厚士習之美以之責成經管實足垂久遠而無流弊合無恭懇皇上天恩敕下陝甘督撫學政臣各立案嗣後督撫學政及各衙門分月輪課其院長堂課各規條卽乞照臣所議辦理一切責成紳董承管是否有當伏乞皇上聖鑒施行疏入奉上諭著卽知照陝甘督撫學政立案嗣後均照此次所定章程

辦理欽此時同治十二年十月十五日也於是涇陽議敘同知銜吳建勳捐隙地以爲之基城固訓導澄城姚劭誠澄城教諭白河王賢輔集資於東候銓同知涇陽怡立方候選訓導富平張樞咸寧楊彝珍涇陽吳乙東安康謝鴻猷從九涇陽牛興宗集資於西不費公家絲粟一年而事舉雖創始疏略而規模固已宏遠矣

論曰許公出曾文正之門有經世志文正以大儒奮迹湖湘削平巨寇成中興偉績許公固心識之而陝右數嘗寇亂士無搢柱其閒者有亦輒歛豈倡之無其人與抑亦教養未豫無以激厲其志氣恢擴其才猷也經義明而智勇

出治亂之迹既明必有興起而任天下之重者然則創始之功烏可忽乎哉